



*Sabtu, 3 Juli 2021*

**Ogen: Imamat 22:1-3**



**Persembahkan Si Badia**



**E**rsembah eme sada bagin kegeluhen kalak si er-Dibata. Ersembah e me sada sikap mehamat nandangi Dibata. Ibas ogenta enda ndai ituriken maka *si pemena* Dibata e badia, emaka la banci lang persembahen si endesken man banNa pe arus Badia. Badia ertina bersih, *terpisah*, la lit campurna. Alu si enda ngatakenca maka persembahen si endesken man Tuhan e arus bersih, mehuli, la lit campurna (murni). *Si peduaken* Dibata mpersingeti Harun maka kalak si mereken persembahen si Badia e ncidahken ia mehamat man Dibata dengen ipeganjangna (ipehagana) gelar Tuhan. Ertina kinihamatenta man Dibata teridah arah persembahen si endesken kita man Dibata. *Si peteluken* kegeluhen/lagu langkah kalak si engendesken persembahen ras si ngaloken persembahen e termasuk imam Harun ras anak-anakna) e arus bersih, la banci meluat, melket ras sidebanna. Ngatakenca maka perbahanenta i bas nehken persembahen e arus sentudu ras biak Dibata eme Badia. *Si peempatken* perintah Dibata maka kerina si enda arus iikutken seh rasa lalap, labo i bas paksa-paksa tapi jadi bagin totalitas kegeluhen.

Senina moria ibas kekelengen Tuhan sienda kerina jadi perenungeta ibas nehken persembahen man Tuhan. Persikapenta ras seisi jabuta (bapa, bagepe anak-anak) arus ipersiapkan alu mehuli, segelah seisi jabuta pe mereken si mehulina man Tuhan, labo terjeng persembahen bagi korban/sen, barang tapi si la banci lang eme pusuh i bas mere rikut ras perbahanen si bersih, labo segelah iidah kalak si deban dengen ipehaga kalak si deban kita arah persembahen si endesken kita e. Wari pepagi bengket kita i bas kebaktin minggu kerja rani, mari ersikap kita guna mereken si badia man Tuhanta si erkuasa.